



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6 Yangia anidakangma : Tir Yimyim tiryimyim@aolima tir yimyim TAPAK 8

AITC fact-finding
teloki Manipur semdang

Korea Open: Sindhu tsukogo;
Prannoy tanabuba round-i iogo



VOL. XX NO. 277 (ADOK 277) DIMAPUR YANGTEPNÜ (THURSDAY) CHITENI (JULY) 20, 2023 ₹ 5.00

Naga Hoho-i M. Lucy Maring tepsetba aitsür

Dimapur, July 19, 2023 (TYO): Imphal nung M. Lucy Maring tepsetba khukhua aitsür ta Naga Hoho-i metetdaksüogo.

United Naga Council (UNC)-i acha-ayanga Manipur sorkari Coordination Committee on Manipur Integrity (COCOMI) den tenangzükba agiba mapa küma inyaksü ayongzük. Manipur nung kin balala tsüngda putepa alitsü atema iba tenangzüktep nung shia aliba ajak inyaksüla ta Naga Hoho-i ashi.

"Manipur nung kin o kin anema raraba atema Naga Hoho-

i süoki ia bilemer aser onoki Manipur nung yimjung atema noktaker. Iba rara nung state sorkari tali bilemloka aoba civil society organizations aser extremist teloktem den yaritepa Naga nung anema inyakba mesüra aniokba onoki magizüker" ta Media Cell, Naga Hoho-i sangdong ka nung metetdaksü.

Onoki India aser Manipur sorkartem dang olemtep alitsü aser rarar tsüngda tiyongtsü nung angatetteptsü ayongzük, ta parnokisa ashi.

NDA mesüra I.N.D.I.A. nung party 11 madener

New Delhi, July 19, 2023 (Agencies): India nung political party 65-i Bharatiya Janata Party (BJP) mesüra Congress-i aniba teloktep nung denogo saka tang tashi nung party 11-i teloktep kecha nung maden lir.

Political party 11 nungi tang Parliament nung MP 91 lir aser parnoki 2024 Lok Sabha elections atema tiyongtsü nung dang alitsü lemtepa lir.

Party 11 rongnung kar state tulu asem- Andhra Pradesh, Telangana aser Odisha nungi lir. Item state asem senteper Lok Sabha MP 63 lir.

Congress aser tanga opposition party 25-i

Mongulbarñü Indian National Developmental Inclusive Alliance (I.N.D.I.A.) sayaogo aser parnoki BJP-i aniba NDA den tokteptsü. NDA teloktep nung political party 39 dena lir.

I.N.D.I.A. mesüra NDA nung madenba teloktem- YSR Congress Party (YSRCP) Biju Janata Dal (BJD), Bharat Rashtra Samithi (BRS), Bahujan Samaj Party, All India Majlis-E-Ittehadul Muslimeen (AIMIM), Telugu Desam Party (TDP), Shiromani Akali Dal (SAD), All India United Democratic Front (AIUDF), Janata Dal (Secular), Rashtriya Loktantrik Party (RLP) aser SAD (Mam).

Kiphire district nung anentsüh aika alu



Dimapur, July 19, 2023 (TYO): Tesüiba anogo ishika tzünglu kanga aruba ajanga Kiphire district kübok tesem aika nung anentsüh alua lir. Iba ajanga kibong 60 shi dang kongshir.

Kiphire nung Mission Compound ward nung anentsüh tulu ka aliba ajanga kibong aika dak kongshio go ta Bodbarñü ketdangsurtemi ashi.

Kiphire District Disaster Management Authority aser district administration ketdangsurtemi lendong

atalokba tesem semdangogo.

Anentsüh ajanga kongshiba kibong 6 nem relief funds agütsüogo ta osang angazük.

Anentsüh agi kanga mejungi kongshiba tesemtemji Mission Compound ward, Power Station ward, Jail ward aser Kiphire Village Baptist Church kübok tesem kar lir.

Sorkari Rest House ward aser Forest ward nung ward chairmen nem tarpaulins alia anentsüh aliba tesemtem meibangtsü atema senotsü teyari agütsüogo.

S Phangnon-i Rajya Sabha nung vice-chairperson inyaksü



New Delhi, July 19, 2023 (Agencies): Rajya Sabha indang panel of vice-chairpersons nung züngsemtsü atema Nagaland nungi BJP MP S Phangnon Konyak shimogo.

MP S Phangnon ya Nagaland BJP Mahila Morcha tir lir. La ya Mon kübok Oting yimtsür lir.

"Council of States (Rajya Sabha) Chairman Dhankhar-i Rules of Procedure and Conduct of Business kübok na July 17

nungi Panel of Vice Chairpersons nung züngsem ka asütsü shimer" ta Rajya Sabha-i Phangnon Konyak dangi shidi ka nung metetdaksü.

"Asen linük tenzükba wadang nung iba mapa tasen kanga ajemalua agizük. Rajya Sabha Chairman Jagdeep Dhankhar-i kü dang temulung alemba atema kangasa pelar. Ni akokba tashi meranga inyaksü" ta Phangnon-i Twitter nung

metetdaksü.

Asür Rano Shaiza sülen Phangnon ya Nagaland nungi tanabuba tetsür Member of Parliament lir. 1977 küm asür Rano-i Lok Sabha MP ka ama inyaksü tenzük.

Rajya Sabha indang Vice Chairpersons panel nung züngsem asütsü shimba ya kanga dang meraket maongka ka lir.

Iba ajanga Phangnon-i Rajya Sabha sendentem len anitsü maongka angutsü. July 20, 2023 nungi Parliament indang Monsoon Session tenzüksü.

2023 assembly elections matongdang Nagaland nung tetsür MLA ka danga maliasü saka taküm election nung NDPP nungi tetsür candidate anati takok ngua MLA kümogo.

1977 küm Post-Emergency sülen Rano Shaiza-i United Democratic Front (UDF) candidate ka ama Congress lennir Hokishe Sema madak takok ngua Nagaland nungi mezüngbuba tetsür Lok Sabha MP aküm.

Tanü nungi Parliament indang Monsoon Session tenzük

New Delhi, July 19, 2023 (Agencies): July 20, 2023 nungi Parliament indang Monsoon Session tenzüksü aser August 11, 2023 nü tembangtsü.

Tan Parliament session nung o kanga atsütepa jembitsü imlar kechiyong Bharatiya Janata Party (BJP) aser opposition party temi taküm state balala nung assembly elections aser 2024 Lok Sabha elections atema renemshiba mapang ka lir.

Sangküm general elections matongdang Opposition party 26 loktepa aser 'I.N.D.I.A.' ta tenung ajaba sülen anogo ana lir Monsoon Session tenzük.

Bodbarñü all-party senden ka amenba sülen Union Parliamentary Affairs Minister Pralhad Joshi-i "sorkari rules kübok tebilemetsü onüktem benoka lemsateptsü mulunga lir aser legislative listed items 31 bendenlokogo" ta osangbener dang ashi.

"Party ajaki Manipur indang olemtepnür aser sorkaria iba onük jembitsü renema lir" ta Joshi-i ashi.

Parliament indang Monsoon Session atema bill tongtipang 31 tashi benoka lir. Iba nungi tongtipang bill temji item ya lir.

The Cinematograph (Amendment) Bill, 2019, The DNA Technology (Use and Application) Regulation Bill, 2019, The Mediation Bill, 2021,

The Biological Diversity (Amendment) Bill, 2022, The Multi State Cooperative Societies (Amendment) Bill, 2022, The Repealing and Amending Bill, 2022, The Government of National Capital Territory of Delhi (Amendment) Bill, 2023 (to replace ordinance), The Jan Vishwas (Amendment of Provisions) Bill, 2023.

MANIPUR TENSA: Matentsü (clap) atema teka ana nungdaker ta Congress-i metetdaksüogo. "Sorkari Parliament tiptema agia onüra angadangtsüla aser Parliament nung Manipur indang onük jembitsüla" ta Congress-i ashi.

"Ni Business Advisory Committee senden nung denogo aser lemsateptsüba onük ajak shiogo. All-party senden nuga ni item onük benoka jembio go. Manipur indang onük benoka jembitsüla" ta Congress lennir Adhir Ranjan Chowdhury-i ashi.

"Manipur nung tensa kanga mejungi kümdar anungji onoki asüng adjournment motion ka benoknür" ta paisa ashi.

SINO-INDIA ARRTSÜ: Adhir Ranjan Chowdhury-isa India-China arrtsü, north India nung tzümetsüng aser Balasore train lendong onüktem benok.

"India-China arrtsü tebilemetsü aser shishilembabaren nung

metokmeperi atema o atsüteptsü ni takhangba agütsüogo" ta pai ashi.

Prime Minister Narendra Modi-i Manipur atema ola madokba ashishir aser pai Parliament nung iba onük jembitsü akhanger, ta Chowdhury-isa ashi.

DELHI ORDINANCE: Aam Aadmi Party (AAP) lennir Sanjay Singh-ia all-party senden nung aden aser Centre-i May 19 nü Delhi sorkar indang tashi alenbangtsü indang Ordinance ka bener aruba anema jembii.

"Iba bill ajanga India indang federal structure samatsür. Onoki black ordinance anema noktaksü" ta pai ashi.

JD(U) lennir Ranjan Singh-ia 2024 Lok Sabha elections nung BJP atsüngdoksü ta ashi.

"Opposition atema teratatsü kecha mali. 2024 elections nung Modi-i tamakok angutsü. INDIA-i takok angutsü" ta Singh-i ashi.

WOMEN'S QUOTA: All-party senden nungsa Odisha nungi Biju Janata Dal (BJD), Telangana nungi Bhartiya Rashtra Samithi aser YSR Congress teloktemi women's reservation bill benoka jembii.

Iba bill ajanga Lok Sabha aser state Assembly ajak nung menden asemsü nungi ka tetsürtem nem lemezüka yutsütsü meranger.

Mkg nung tetsür shishilempar asoshi Financial Literacy workshop agütsü

Dimapur, Chiteni/July 19 (TYO): Women Entrepreneurs Network Nagaland (WENN) ajanga Mokokchung nung tetsür temi anir aliba business atema Financial Literacy workshop ka State Bank of India den lungjemer July 17, 2023 nü agia liasü.

WENN ajanga Nagaland nung aliba district toku nung iba workshop ya ayongzüksü lir, aser Mokokchung nung agiba ya district pongu buba alitsü.

Iba sentong nung shisalen sayur Viliezoto Neikha, Assistant Branch Manager, SBI Mokokchung Town ajanga financial literacy onük tejangja awajema liasü.

Iba workshop nung senotsü ketdangsuba, accounts tabu balala, loans, credit scores aser

entrepreneurs atema financial literacy dak sendakba tongtipang yimyatem sayua liasü.

Iba sentong nung Deputy Commissioner, Mokokchung, Tsuvisé Phoji ajanga jembidang WENN dang local women entrepreneurs tem den network amenoktsü aser parnok den lungjemer inyaktsü ayongzüka liasü.

Mokokchung ya "Land of Pioneers" asünung entrepreneurs aintsü asoshi maongka peria lir, anungji district alema oa business ulushia aotsü lenmang bushitsüla, ta pai ashi.

Women Entrepreneurs Network Nagaland yagi Nagaland nung tetsür entrepreneurs yaritsü asoshi sentong tali ayongzüksü sentong lir.

Mokokchung nung bank nung inyaker temi IMDH nung azü agütsü; süngdong temtsü



Mokokchung, Chiteni/July 19 (TYO): Mokokchung nung July 19, 2023 nü India linük ajunga den kulemi 55 buba bank nationalisation day anogomung State Bank of India Officers' Association (NEC), Mokokchung Region aser AIBOC State unit semtepa ayongzüker Blood bonation camp aser tree plantation sentong ka IMDH Mokokchung nung kaogo.

Iba anogo nungtem nung sentong ka agidang Com. Imtisanen Ao, CCM, SBIOA (NEC) ajanga tarur pela

agizüka jembi, Lokho Peter, AGM, RBO Mokokchung ajanga anogomung nungtem indang telok nem angatetdakja jembia liasü.

Maneni Dr. Marina Yaden, Medical Superintendent IMDH Mokokchung ajanga SBIOA-I iba ama sentong apiteta agia nüburttem nem teyari agutsüba den ano nüburttem kumzüksü asoshi inyakba atema tepelaba o shia liasü.

Tanü anogo parnok i azü unit 20 tenlaba den IMDH temeket nung süngdong aika temja liasü.

NLA Committee on Petition senden thinener

Dimapur, Chiteni/July 19 (TYO): Mepaitoktetba tensa kar mechi July 20, 2023 anüngdang 11:00 ako nungi agitsü aliba Committee on Petition senden July 25, 2023 anüngdang 11:00 akoi thinener, ta MLA aser Committee on Petition indang chairman, K. Konngam Konyak-i sangdong

ka nung ashi. Anungji Committee senden ya shia aliba anogo Assembly Secretariat indang Committee Room nung amentsü. Committee on Petition züngsem ajak iba senden nung arua adentsü ayongzüker, ta sangdong ajangasa ashi.

I-Day atema mapa alemtsü senden ayonger

Dimapur, Chiteni/July 19 (TYO): Independence Day amungtsü asoshi mapa alemtsü aser sentong yanglutsü atema senden ka Home Commissioner, Nagaland indang office chamber nung July 21, 2023

nikongdang 2:00 ako nungi amentsü, ta sangdong ka ajanga ashi.

Anungji iba senden nung sendaka aliba department ajak nungi arua adentsü ayongzüker, ta sangdong ajanga ashi.

Kohima Science College nung menoknok indang mock drill agi



Kohima Science College, Jotsoma nung July 18, 2023 nü Nagaland State Disaster Management Authority (NSDMA) aser District Disaster Management Authority (DDMA) Kohima lungjemer mock drill agidang tangokba noksa nung angur.

Dimapur, Chiteni/July 19 (TYO): Nagaland State Disaster Management Authority (NSDMA) ajanga District Disaster Management Authority (DDMA) Kohima den lungjemer July 18, 2023 nü Kohima Science College, Jotsoma nung menoknok anokba indang mock drill exercise agia liasü.

Iba exercise mapang Khrolou Koza Lohe, Assistant Manager, Training & Education, NSDMA ajanga KSC nung azüngertem dang alimar lendong asoshi renema alitsü kanga tongtipang ta ashi aser 2001 küm Bhuj menoknok ajanga teraksa bener arutsüba tatishitsü amshia jembi.

School aser college tem nung Disaster Management structure alitsü kanga tongtipang lir aser yangji Principal ya Chairperson asütsüla, ta Lohe-i ashi.

Disaster management (DM) team ka tentetsü nungdaker, disaster response plan yanglutsüla aser yanghi lendong timtem jangjatetba, safety assessment, resource mapping (internal & external), DM team balala tentetsü nungdaker, ta lai ashi.

Disaster Management structure kübok team balalai inyaktsü indang Lohe-i rateta ashidang, ajungben lendong timtem mapang awareness agütsü aser tongtipang osang prokshitsü asoshi Disaster Awareness Team for Warning & Information Dissemination alitsüla, ta ashi.

Tesayurtem lenir ama iba team yagi lendong mapang kaketshirtem payimi anizüker aotsü asoshi class shia Evacuation Team alitsüla, teyari nungdaka alirtem bushiteta kumzüksü asoshi Search & Rescue Team alitsüla, ta lai ashi.

Yirur alirtem nem medical aid agütsü asoshi First Aid Team ka shimsüla, aser mi dak sendakba lendong ketdangtsü asoshi First Aid Team alitsüla, ta Lohe-i ashi.

Kaketshirtem anizüker aotsü asoshi Bus Safety Team alitsü tim, ta lai ashi.

Lohe-isa mock drill exercise ya kanga tongtipang lir, kechiaser iba ya ajanga lendong mapang yariteptsü asoshi renema aliba tendanger aser iba amala drills ajanga nungdakba melenshir, ta ashi.

Lendong ajunga menokdangtetaka nüburttem nem disaster management indang shisatsü agütsüba ajanga lendong ajanga kongshiba tajemba kimdaksür.

Kasa mock drill exercise ya Living Tree School, Tsiepugei, Kohima nung July 20, 2023 nü agütsü.

CMO Mokokchung nung U-WIN training tenzükogo



Dimapur, Chiteni/July 19 (TYO): U-WIN trainers nem asemnü training agütsüba sentong ka Conference Hall, Office of the Chief Medical Officer, Mokokchung nung July 19, 2023 nü tenzükogo aser July 21, 2023 tashi agitsü.

Iba sentong tenzükogo Dr. Takosunep DPO (UIP/RCH) ajanga jembi aser U-WIN portal indanga lemsatepa liasü. Chief Medical Officer, Mokokchung, Dr. Pai U-WIN indang tongmelang agi lemsatep aser sentong nung jembidang shilem

agir ajak dang temolung agüja adentsü aser district nung iba sentong takok ngua inyaktsü ayongzüka liasü.

Directorate of Health & Family Welfare, Kohima nungi Dr. Imkongtensu Longchar, State Immunization Officer (SIO) UIP ajanga ashiba agi, U-WIN ya CO-WIN indang maneni agiba sentong ka lir, koba COVID-19 pandemic mapang amshi.

U-WIN indang tongmelang agi lemsatep aser U-WIN app ya mashisa

tetsürtem tenung zülüoka vaccine agiba sapang ka lir, kong delivery outcome record ayur, tanur asoba, dose mezüngbuba agiba aser vaccination ajak zülüoker, ta ashi.

Iba system yagi vaccination sessions indang sentong yanglutsü melar, real-time nung vaccination status digital nung update asür, UIP atema data ajunga record ayur, ta pai ashi.

Iba sentong nung shilem agirtem nem U-WIN Portal; Hands on practice on Self-Registration Module, Delivery Point Module, Vaccinator Module and on Real time registration on U-WIN live portal amala nung training agüja liasü.

Iba training nung shisalen sayur ya Dr Imkongtensu Longchar SIO, Sentirenla Consultant NUHM, Achila VCCM aser Tongpang BPM nungertem lir.

Training nung GNM, Pharmacist, Vaccinator, CHO, ANM, LHV, BPM aser F/A nungertem adener.



July 19, 2023 nü Parliament Library Building, New Delhi nung Lok Sabha Speaker, Om Birla leniba nung Business Advisory Committee (BAC) senden amendang tangokba noksa nung angur. Kasa noksa nung Union Minister for Parliamentary Affairs Pralhad Joshi, Lok Sabha nung Opposition Lenir Adhir Ranjan Chowdhury aser Lok Sabha Secretary-General Utpal Kumar Singh nungera angur.

Parliament senden jakdang party ajak senden ayongzüka amen

New Delhi, Chiteni/July 19 (Agencies):

Bodhbarnü Centre sorkari ayongzüka party ajak senden nung sorkari, taruba tzungluruwa mongpu Parliament senden nung Manipur tensa atema jembitsü sorkari melunga lir, ta metetdaksüogo.

Parliamentary affairs minister, Pralhad Joshi-i, "Tanü senden tenzüker. Anungji party ajak nungi floor lenirtem jaoka liasü. Iba senden nung party 34 aser lenir 44 aden. Tongtibang onük aika onok nem metetdakja liasü. Sorkari legislative onük aika agizükogo. Party ajaki Manipur tensa atema o lemtepnar aser sorkari iba onük

nung o lemteptsü melunga lir," ta metetdaksü.

Mongolbarnü Raja Sabha Chairperson, Jagdeep Dhankhar-ia party ajak senden ka ayongzüka liasü, saka party aika nungi medentetsü asüba ajanga atsülang.

Tzungluruwa mongpu senden July 20 nungi tenzüksü lia onük aika nung o lemteptsü atema Bodhbarnü Centre sorkari party ajak senden ka ayongzüka liasü.

Tzungluruwa mongpu senden ya August 11 nü tembangtsü.

Manipur tensa dak sendakba nung opposition party temi Ato kilonseri telangzüba agütsüsüla,

ta takhangba agüja arudar.

Parliament senden ajak senteper 17 asütsü. Parliament building tejenba nung senden tenzüksü, iba sülen building tasenbai belentsü.

Mongolbarnü Bengaluru nung opposition party 26 shi nungi lenirtem senden mena liasü aser iba senden nungji parnoki NDA anema tokteptsü atema Indian National Developmental Inclusive Alliance (INDIA) teloktep tentetogo.

Mongolbarnüsa BJP-i aniba National Democratic Alliance teloktep senden-a amen, aser iba senden nungji Ato kilonser, Narendra Modi-i jembia liasü.

Uttrakhand nung nisung 15 electric current agi puseta asü

Chamoli/New Delhi, July 19 (Agencies):

Uttarakhand state nung Chamoli district kübok Alaknanda ayongküm nung aliba Namami Gange project indang sewage treatment plant ka nung nisung 15 electric current agi puseta süogo, iba dak alia aser nisung tenet yiru, ta Bodhbarnü police-i metetdaksü.

Superintendent of Police (Chamoli), Pramendra Dobhal-i, Mongolbar aonung nisung ka current agi puseta asüba osang bendentsü atema police iba tesem jagi yoka liasü, ta metetdaksü.

Bodhbar anüngdang 11:30 ako meta plant anasa aliba merang 'railing' ka ajanga electric current arua nisung 15

puseta asü aser nisung tenet yiru; tang tashi ibaji kodaser atalokar mejangjar, ta pai ashi.

Dobhal-i, asür nisung 15 rongnungji police sub-inspector, Pradeep Rawat den home guard sepai asem densema lir, ta metetdaksü.

Iba osang angashia Chief Minister Pushkar Singh Dhemi-i asür kibongtem den mangyim jashi lemsatepba den külemi iba tesem semdang.

Chief Minister-isa magistrate ajanga iba tatalokba bushisüngdangtsü tuyuba den külemi iba lendong nung asürtem kibong shia nem sen lakh pongungu (lakh 5) aser yirua alir shia nem sen lakh kaka (lakh 1) teyari agütsü.

Dhemi-isa, iba tatalokba dak

sendakba nung aibelenertem nem temerenshi tulu agütsüsü, ta metetdaksü.

CM tetuyuba nung ajemdaker District Magistrate, Himanshu Khurana-i Additional District Magistrate Dr. Abhishek Tripathi inquiry officer shimogo aser pa dang hopta ka tsüngda bushisüngdangba report agüjang, ta tuyu.

Chamoli Chief Development Officer, Dr Lalit Narayan Mishra-i, iba lendong nung yirurtem helicopter ajanga AIIMS-Rishikesh-i anir oa yaridar, ta metetdaksü.

Union Home Minister, Amit Shah-ia Dhemi dangi phone süa iba tatalokba osang metetpelaogo.



July 19, 2023 nü Gujarat kübok Veraval nung tzunglu sashia aruba sülen tzü metsünga alidak nungi nisungtem kümzüka anir aodang tangokba noksa nung angur.

Pelaba Metetdaksür



MRS. TSÜKRENNUNGLA
15 October 1939 - 14 July 2023

Ozü asükhu bena alidang adianutem kwikati sarasadem, nübu, shisatsü, rongsen agi yaritepogo ajak dang kanga pelaba metetdaksür. Nenok teyari ajanga tesünep, tashi, aser tasütait onok asükhu bena alidang nguogo. Nenok ajak dang kanga pelar. Tsüngremi nenok ajak moajangma.

- Chirnurtem, Semchirtem, Tanabuba semchirtem aser Kinungertem.

OFFICE OF THE YAONGYIMSEN VILLAGE COUNCIL TENÜNGSANG AGÜTSÜR

Yaongyimsen Village Council ajanga NSSB Exam - 2023 tatidang nung takok angurtem nem tenüngsang agütsür.

1. **MISS IMTISUNGLA IMSONG**, D/o. Mr. Lanusobu Imsong & Mrs. Alinungla, LDA-cum-Computer Assistant under Higher Education.
2. **MISS WATINARO A IMSONG**, D/o. Mr. Aochuba Imsong & Mrs. Akumnungla, LDA-cum-Computer Assistant at Administrative Training Institute.
3. **MR. AOAKUM**, S/o. Lt. Mongtimangyang Imsong & Mrs. Sungjemkala, Under Graduate Hindi Teacher under School Education.
4. **MR. IMSUMANENT LONGKUMER**, S/o. Mr. Tiakaba Longkumer & Mrs. Arenmongla Imsong, Physical Education Teacher under School Education.
5. **MR. SHILU JAMIR**, S/o. Mr. Limatoshi Jamir & Mrs. Talisangla Imsong, LDA-cum-Computer Assistant under Director General of Police.

Maneni tarutsü anogotem nung nenok taküm aser wadang ajak nung Tsüngrem lenisüba denang ta sarasademtsür.

Sd/-	Sd/-
NUNGSANGTOBA	TONGPANG
Chairman	Secretary
Yaongyimsen Village Council	Yaongyimsen Village



APPENDIX- IV-A [See proviso to rule 8 (6)]
Kiojen ayoktsü notice
Securitisation & Reconstruction of financial Assets and Enforcement of Security Interest Act, 2002 kübok E-Auction ajanga ayoktsü notice, Security Interest (Enforcement) Rules, 2002 kübok proviso to Rule 8 (6) , 6 (2) & 9 (1) azüngtsüla.
Public aser talisa sen apur (tem) aser Guarantor (tem) dang, Secured Creditor dang mortgaged/charged süa aliba, tsünglanglen shia aliba kiojen Authorised Officer of Indian Bank (taoba mapang Allahabad Bank), Dimapur Branch Secured Creditor-i agiadokogo, aser ibaji "kong ali yamaji", "koma lidir yamaji" aser "yangji aliba ajak" Indian Bank (taoba mapang Allahabad Bank), Dimapur Branch, Secured Creditor nem agütsüsü aliba sentsüh, **Mrs. N. Sashila Jamir, W/O Mr. Pallav Kumar Sharma, Address: Ward No. 20 House No. 854 (A) C-Khel Half Nagarjan Dimapur Nagaland Pin-797112 aser Mr. Pallav Kumar Sharma, Address: Ward No.20, House No. 854 (A), C-Khel Half Nagarjan Dimapur (Nagaland), Pin-797112 (Borrower); Mr. Kilemsungba Ao, Address: House No. 48, near Ao, Church Imkonglenden Colony PO+PS- Dimapur (Nagaland), PIN- 797112 (Guarantor); T. Asem dangba, Address: House No.06, Airport Road Aoyimti, PO+PS- Dimapur (Nagaland) Pin-797112(Guarantor); Mrs. K. Tainla, Address: House No.873, C Khel Kuda Village, Nagarjan PO+PS Dimapur (Nagaland) Pin-797112(Guarantor) aser Mr. Takosashi, Address: Near Welcome Gate Imkonglenden colony PO+PS Dimapur Nagaland Pin- 797112 (Guarantor) nung dang nungi sen 43,39,169/- (Rupees Forty Three Lakh Thirty Nine Thousand One Hundred and Sixty Nine Only) (17.07.2023 tashi nung), iba denji maneni sen tetemlok, costs aser tanga charges aser expenses alanzüktsü atema 23.08.2023 anogo nung ayoktsü, ta sangdonger.**
E-auction ajanga ayoktsü aliba kiojen osang tejangja tsünglanglen agütsür:

Detailed description of the Property	Half Nagarjan, Dimapur Nagaland nung Late R. Nganshimongba'er jala, Mrs. N. Sashila Jamir tenüng nung deed no. SD-721/05 dated 30/09/2019 kübok Nagarjan Block, Mouza No. 03 Dimapur Nagaland nung Dag No. 187, Patta No. 65 agi ayimjemba alil tasazük 008-01K-04Ls aser yangji aliba ajak. Bounded by: On the North by: Land of Lingshi On the South by: Land of K Shangreigam On the East by: Land of Toshi Lkr On the West by: Approach Road
Encumbrances on property	Not Known any
Reserve Price	Rs. 1,56,43,000/- (Rupees One Crore Fifty Six Lakh forty Three thousand Only)
EMD Amount	Rs. 15,65,000/- (Rupees Fifteen Lakh Sixty Five Thousand Only)
Bid incremental amount	₹ 10,000/- (Rupees Ten Thousand Only)
Date and time of e-auction	23/08/2023 from 01:00PM to 5:00PM
Property ID No.	IDIB50502043373

Online ajanga bid asüba nung shilem agitsü atema onok indang e auction service provider MSTC Ltd indang website (www.mstcecommerce.com/auCTION/home/ibapi) reprangtsü akok. Technical Assistance atema MSTC HELPDESK No. 033-23400020/23400021/23400022 nung call asüba den tanga help line numbers, service providers help desk nung angutsü. MSTC Ltd den Registration status atema ibapiop@mstcecommerce.com contact süang aser EMD status atema ibapiin@mstcecommerce.com contact süang.

Kiojen osang tejangja aser kiojen noksa, iba denji auction asütsü telatetbatem : https://ibapi.in nung reprangtsü akok aser iba portal den sendakba jangshitsü atema help line number '18001025026' aser '011-41106131' ajanga tongteprateng.

Bid asütsüpurtem dang website https://ibapi.in aser www.mstcecommerce.com ajanga kiojen bushidang temalen shia aliba Property ID Number shidak amshitsü metetdaksür.

Date: 18/07/2023
Place: Dimapur
Authorized Officer



TIR YIMYIM YIMOBILEM (EDITORIAL)

DIMAPUR

YANGTEPNÜ

CHITENI 20, 2023

Tamachi ain adok matatsüla!

A tangji, yashi asenoki iba yimobilem nung lemsatepba ama Naga nungertem ya tamachi amai lir, kechiyong tangari asenok akoksatsüsa inyakaka ola madoker. Ano, Naga nungertem rongnungsa süaka meshitak aser meindang mapatem anema Aortemisa ola madokba amai repranger, kechiyong tangartemibo ochimashi, tamajung aser meindang telok aser mapa anema züluba khenkhenbo azünger aser jembiba angashir. Ashiko, ibayongji maparen aika nung meteta aser memeteti Aortemisa takoksaba akoksadar asütsüa akok. Ajisüaka, talisa yimten nung alirtemi tamachi ain adok matatsüla, kechiyong ain adokba rongnunga tamachi ain adokbasa lendong tuluba asütsü. Tanü Nagaland nung nübortem timtem takoksa jenti ajuruaka ola madok aremzüka ya akhi masü, yangi lendong lir, ibai ajemajema ola madoki alima poksatsütsü bomb yangluba mapa aser mapang amato ka bilemstsüla. Alima aso 18 buba nunga French nungertema Louis XVI chuba mapang nung chubai anir pa kübok takar aser tulurtemi nübortem mezüngmeshia timtemdaksüaka ola madok talangka aremzüka arur tesüsabo chuba aser chubatsür tenaprongla nübortem pua tepseta endokba otsü nung asenoka tangazütsü mapa keta lir. Louis XVI chuba mapanga pari anir temaba jenjang nung alir takar aser tulurtem ket nung makatsü kecha mali asü saka nübortembo chiyongtsüa maka timatem. Aji oda, chuba ozüngji Tsüngrem ozüng, anungji shinga ola madoktsüla ta asüba yimsüsüba kübok nübortem timtemaka ola madoktet. Iba tiaji mesüka tanü asen lima nunga nisung kabo nübortem tenüng nung mapa tapu balala mashimashi inyaker akar saka nübortembo pei chirnurtem kaketrejua moudaktsütet aser parnok taginüba metongtsütet aika taküm raksadagi. Aji oda, Nagaland nung sensak tia mekottet kibong aika timtemdagi aser lanurtem aika drugs lar küm dagi. Kibong aika nung tsüraburtemi tanurtem anepalu mesütet jabaso aika ashir auer kümdaktsür aser jala aika pei temang yoka taküm alitsüsa kümdaktsüogo. Parnokji pei taküm mapa agi nümadanga jangratema alir masü saka temulung nungbo akseta aser ain adoka alir. Item jagi tangbo shinga anema ola madoker. Ano, Nagaland nung shisabolutsükaji kibong shia nung zünger mapa maka aser mangu kazüba pur jenti lir. Item jagi Nagaland nung lenir aser ketdangsertem ochimashi mapatem jakdaka inyakba angur. Parnokbo zünger mapa maka, anungji chiyongtsüa maka aser peisasa tula süoshia malitet timatemer. Ajisüaka, parnoki ngua par zünga purtem karbo kechi nungi par tsüraburtemi bendentsüar memetet mejungketa tua akaba angur. Iba jagi Naga nung lanurtem tsüngda telok (class) ana kümadokogo. Ashi, asenoki asen mapa nung timi inyak nungbo, Tsüngremi alakteta moatsürtem kar kanga takar akümyongkala, nübortem rongnungbo kecha balaka kar takarba aser kar sensakba ta melila. Kar anogo shia shi ango den chiyonger saka karbo chiyongtsüa maka ta asüba yimkong nungji timtem maksü marem yakta rongrong tulu adoktsü. Kechi mapa nung südirsüaka indangindanga inyakba tetka maka, kechiyong item jagi lendong memenar aser item rongsentemjibo mesamai senmang küma ojen aoer. Atangji, tanü Paris nung France nung chuba aser chubatsür aliba bilemteta raliwalirtem puatsü atema parnok noksa aser parnok takdang aser parnok ayipba yimten tashi yua lir, saka küm noklang ana jakdang parnok pei nübor sensak tia mangu chuba kidang ngasangatema aliba rongsentem to senmang maka kümogo. Koba yimten yimli nung südirsüaka pei yimsüsüba mapang aser pei wangshiba mapang, nübortem ola madokdaksü tamachi ama kümdaktsür, tenük amur nübortem indang mebilemi pei agitsü dang bilema nübortem kangshira, nübortem timtem marem kenübo ola adoktsü. Tamachi nisung ya yiar masü aser suwar-a masü saka terajem shisatsü maliba nisung, anungji pa meyong ser nung asen tesimal ka agir pa nem tesimal ka agütsü nunga joka tua pelaba nisung lir. Ajisüaka, tamachi nisung asüyonga kanga mezüngmeshira maremtet ola adoktsü, idangjibo kechi ataloktsüar memetet. Aji meteta, nüchi mesükba purtemi mapa shitak inyaktsü atemabo tamachi ain adok matatsüla.

OLEMSABANG

Arogo nung sensu ka

Süpongüngsang Longkümer, Darogapathar Dimapur

Kü tamang tangatetba nungi arogo sensu tajung ka indang züluner, saka tamasa ocet azünger ajak dangi khrista temeim salem.

Arogo nung senso tajung ka ta asüdang arogo tenzüka (mattsü yokba) ama angatetter mesüra mezüng tenzükertem Impur chanu ama angatettsü akok. Saka Tsüngrem tsüngdang tama tesü kecha mezüngshir, saka arogo nung züngsem kowe ali item ajak arogo sensu tajung (Arogo nung asurtem) ta angatetti. Ni koba arogo nung tzüsendir tzüsenaka iba arogoji doktsür ni America i oaka aji khrista meyong arogosa anungji yangji kü tenünga lir ta ni amanger aser kü tasu lima nung tzüsenaka America nung ali tashi Baptist arogosa sürapang ni yangjia züngsem anungji ter shilem ya Tsüngremer sensulang asünung Ter nung ka(1) kowepen aatetdir paepenji agütsütsü pa alima kibur. Alima yimsüsüba nungpo küm nung ken sensulang kilen shia nungi kilensaru akir. Yamaji alima kiburji tiyanglur Tsüngrem anungji Abeli San ka mezüng mepuba ter nungi ka aser temo nungi sensu lang ter shilem kibuba nem agütsüba Laishiba nung angur Lipok 4:4 Ni kong lidir idakji agütsütsü ni angatetter. Kechaser aikati bei kong tzüsendir idakjagi ter shilem aser tenla balala yoker. Ni koba arogo nung lidir yangji tanüla chiyongtsü angur aser yangji kü tenla züngsemma arogoi sentong balala küm piyong atema renemer. Temulungtetba tenla aser ter shilem ya ken agi balala asünung ni tanga arogo nung teyari tenla tulu agütsütsü akok. Saka Prayer centre ama shibai lapok Pa /La meyong ter shilema na anasa aliba arogo nung agütsü nungpo Tsüngrem tsüngdang teratatsü malitsü südi ta angatetter. Kechaser Prayer centreji temulunger tenla mesüra nüngtem tenla agi nokdakba mapa ka lir ta angatetter. Saka iba nungjagi ter shilempo arogoi yoknungpo terata malitsü. Kasaji Ita nung ken Yimer Telongjem tekülem ajakji arogo masü anungji tenlatenji nung kanga kümtangtsüla aser Tsüngrem tenzükeri meshiteter ayuba rongsen nung tai memenatsü angatetdi ta lemsatepber. Küm ishika 2 Timoti 4: 3,4 nung kechi zülua ali item tebilemstsü atema jembia aru saka tanü shidak ataloka arudakge..

TSÜNGREMER sensu ka tamang, iba dak alema tanga kecha mali iba tamang nung kija jajaka tetsüpu mali tammang konak nung ajungpen apusutsüsa kümaka tetsüpu mali, iba tamang ten prangpong aser tanga hadir kecha menüngdaker anungji iba lenmang nung jajatsü Tsüngremi ljiip nungi Israel nung anitettsü Mosa jatet saka par kibong merüneme apusuba par chir teküp memejepba ajanga Mosa tepsettsü Tsüngremi pushi anungji kinungtsü Zipporai yakta mejepdoktsüba ajanga Mosa kümzük Lipok 4 :25. Iba mapa agi Tsüngrem tenzüksü atema züzüa masü saka renemshir nokdaktsü tongmelang agi angateter. Mosa aitsür masü asenok asoshi tateshitsü. Israel nung temerem tzüyimküm nung Mosa anema asatepdang Tsüngremi Mosa tang ashi kechiba nai teyari asoshi kü tang yamai ayimtener ? nü ket nung aliba meche jagi tzüyim nungji zükang ta ashiba ya aseni Tsüngrem dak amangba tamang miche jagi ajak akoker ta angatetdaksür. Tsüngrem dak amangertem asoshi CCTV a menüngdaker Tsüngrem wara asoshi pa dak amangertem tamang agi pai kümzüktsü Apj 18 :10 Kibuba tenüngji tashe tait mitsa Temeshipur ajagi asema air aser kümzüka alir. Tenla ki nung kangki dak alema kecha menüngdaker, Tenlaki nung tsüngi atsüzüka indoktsü alenlok nunga aji agi tamang kuli mesayur saka Tsüngrem dak mamangtetba tang sayur. Tsüngrem ya ajak nung ajak anungji tenüngsang ajak pa meyong meimchiri mapa kar nung takok angudang tenüngsang agütsütsü dak alaka mapang shia Tsüngrem tsüngdang tamakoker anungji asenokbo metongshiteptsüba tang ta angatetter. Nisungi tanitebelem nung aipen jakla adoker anungji Mosaia long nung anapen azükba ajanga Kanani meitetba jagi pa ajanga asenok metongshitsür ta angatetdi. Laishiba nung Tsüngrem tenzüker temenen menaba aser medokmebiri zülua aliba jagi parnok mesenmetur masü saka Yisu maru maru tashi pa tenzüker asoshi küm tangtsü metongshitsür ta angatetter. Ajemajema tamangji tepoaji ama lira tamang agi lentong aser tashidak kecha metsüputsüsa amangtettsü nüngdaker. Arogo sensu tajung jagi karbo kotak matongtsü anungji kotaker sensu akümütsü amangdi. Tsüngremi moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Arogoi tzümet süng agi kongshirtem yarir



Pakistan nung Arogoi indang social service wing- Caritas Pakistan nungi volunteers- i tzümet süng agi kongshiba yimtsüngtem semdangba mapang tangokba noksa nung angur.

Lahore, July 19, 2023 (Agencies): Pakistan linük nung tzümet süng lendong nung tanur 41 densema nisung 99 tashi asüba sülen linük nung Arogoi kümzükba maparen inyakba den külemi teyari agütsüba maparen inyakdar.

Arogoi tenetprongla nungi social service wing- Caritas Pakistan-i district sorkartem den yaritepba kümzükba maparen balala inyakdar, ta Caritas Pakistan executive director, Amjad Gulzar-i metetdaksü.

July 15, 2023 nü Caritas Pakistan kübok Lahore nung

aliba Arogoi Punjab province kübok Kasur district nung aliba Our Lady of Sorrow Arogoi team aika yoka liasü. Kasur district nung Sutlej ayong tzü agi mobangba ajanga yimtsüng 14 tzü agi metsüngbang.

Kasa team-isa July 17 nü item yimtsüng aika semdangogo. "Ajisüaka yim pezüibo tang tashi mouteter," ta pai ashi.

Karachi nung tongti putir aser Caritas Pakistan chairperson, Benny Travas-i Gulzar dang nüngdakba teyari oset/chiyungtsü balala bener oa tzümet süng agi kongshiba

tesemtem nung teyari agüjang, ta tuyua liasü.

July 18 nü National Disaster Management Authority-i sangdong ka ajanga, tzümet süng lendong nungsa nisung 175 yiru, kiset shiruru 170 sama aser ki 130 raksaogo, ta metetdaksü.

Tzümet süng lendong nung asürtemji teimbaka Punjab province aser Khyber Pakhtunkhwa province na nungi liasü.

July 17 nü Caritas Pakistan-i nütsüng 4,500 aliba Chanda Singh yim semdang; iba yimdak Khristan kibong 45 dang lir.

ANOGO ABEN TSÜNGREM DEN

Nisung yimya

Lipok 1: 24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenüngdaksü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübuttsü ka aser tesüngmangtsü ka yanglu (T.Ken 139:14). Itemi shisadang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Ne tashikang akhüm kübok ni miimang : tenükjang ama ni kümzükang. T.Ken 17:9.

Tenangzükba: Kechiyong shibai nenok dak kongshir Pai pei nükjang nung kongshir.

Impur nung Palliative care Sensitization den training agi

Impur, July 19 (TYO): teinyaktsü mapa aika lir, ta angatetdaksütsü nükla nung agia arur. Ajioda, Arogoi aser lokti inti-i lungjemer shi aser tanela ajunga nung anepaluba ajanga aika anisüngzük ngutettsü, ta tangatetba nung iba sentong agiogo.

Iba sentong nung ajak agi Asso. Pastor Women aser Health Wellness Centre nungi CHO 42 arua aden. Iba ya tanabuba ayongba sentong liasü.

Iba sentong ya Arogoi aser lokti ajak nem koda masüba timtem agi atongertem asoshi

(Retd) Dr. Obangjungla, Dimapur, Shisalen Sayur süa tangazükba jenti agiogo; maneni ABAM aser ICH lungjemer inyakdang Tsüngremer taochi adentsü sarasademmer, ta ABAM Executive Secretary, Rev. Dr Mar Pongener-i metetdaksü.

Kenya linük nung lumia asürtem 400 dak tema jungogo



Kenya kübok Malinda nung aliba Shakahola arem ketdangsertemi maneni tasü mang ali nungi tuteta aliba noksa nung angur.

Nairobi, July 19 (Agencies): Kenya linük nung alima tatembang matongdang kodaki aotsü atema lumia sarasademdang asürtem tasü mang 400 dak tema ngutetogo, kechiyong tawa ketdangsertemi ano tasü mang 40 ali nungi tutetogo.

Kenya kübok Malinda nung aliba Shakahola arem nung nisung aika lumia asüba ken o dak sendakba nung Pastor Paul Mackenzie pua tang police ket nung lir. Kasa ken o dak sendakba nung melung melemteti nisung 36 pua lir.

Hombarnü (July 17) Coast Regional Commissioner, Rhoda Onyancha-i, iba tatalokba nung

asürtem 403 jungogo aser nisung 95 bo kümzükogo, ta metetdaksü.

Taoba ita ketdangsertemi kümzuka rescue centre nung alirtem aser iba ken o dak sendakba nung tepuokdak alirtem kari lumi tenzüka liasü, ibayongji parnok court-i anir oa parnok anema ken o angadang. Iba sülenjibo parnok aikati chiyungtsü achi melunga chiyungtsü achi tenzüko saka kabo meküzmükteti süogo.

Malinda jila nung nisung 613 samar manguba osang Kenya Red Cross ketdangsertem nem metetdakja lir aser ketdangsertemi maneni nisung rema aliba tesemtem bushidar.

Kasa ken o dak sendakba nung televangelist pastor Ezekiel Odero-a pua lir.

Mavueni jila nung Pastor Odero indang New Life Prayer Centre aser Tenla kidang nisung aika aliba ketdangsertemi kümzuka liasü; Odero-ia pa sülen anidakertem aika tepsetba atema pa anema ken o benoktsü, ta interior minister-i metetdakja liasü.

Mavueni jila ya Shakahola arem nungi kilometer 66 shi pilar lir. Iba arem nung yimsü alia amanger, Paul Mackenzie-ia pa sülen anidakertem dang, lumiseta asüba ajanga nenok tama kodaki oa Yisu Khrista ajurutsü, ta shia liasü.

India nung Protestant pastor ka den Khristan 10 jail nungi chiok

July 19, 2023: India kübok Uttar Pradesh state nung Protestant pastor ka den Khristan 10 jail nungi chiokogo; anti-conversion ozüng kübok hopta ka tejaklen parnok pua liasü.

Uttar Pradesh kübok Bahraich district nung court kati Pastor Babu Ram den Khristan 10 nem bail agütsüba sülen July 17 nü parnok ajak chiokogo.

Osangbener den jembidang Khristantem atema ken o jembiba nung yariteper, Dinanath Jaiswal-i, "Ozü adianutem jail nung chiokba atema onok pelar," ta ashi.

Bajrang Dal teloki Khristantem anema ken o ka agütsüba nung ajemdaker July 9 nü Amongnü tekülem sentong tagidak mapang nung police-i Khristantemji pua liasü.

Bajrang Dal telok tekülem kidang jagi atuba sülen pastor den tangar Khristantem jagi tangartem Khristan yimsü dangi meyipdaksür, ta tai tonglokja liasü.

Parnoki police ajaba sülen police-i parnok pua anir oa court ket nung agüja liasü.

"Kasa Tenla kidang nungjagi Khristan tsür 13-a puer ao saka local court kati parnokbo kobi melii chioka liasü," ta Jaiswal-i metetdaksü.

"Police-i mapang shia tiyazü nung Khristantem anema ken o benokba ya kanga tia maka; Khristantemji Amongnü tekülem sentong nung adener dang liasü," ta Jaiswal-i ashi.

Uttar Pradesh nung Khristantem alitsü kanga tasak kümogo, ta pai ashi.

2020 küm Uttar Pradesh state sorkari anti-conversion ozüng tesashi benokba sülen nungi tenzüka jail balala nung pastor tem densema Khristan aika tepuokdak timtema lidar.

Tesüiba ita trok kija nunga Uttar Pradesh nung Khristantem anema inyakba tatalokba 155 liasü, ta tawa United Christian Forum (UCF)-i metetdaksü.

Tesüiba ita trok nungsa India nung Khristantem anema inyakba tatalokba 400 shi liasü.

Nütsüng million 20 dak tema aliba state- Uttar Pradesh nung nütsüng shilem 0.18 dang Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Repsa

(v) aonsutsü tu petsaba (wring of vegetable leaves)
* Asenoki repji repsar lon küma yanglur.

Repsem

(v) yarisem, züngsem nung zünglok (additional helping hand)
* Taintem den tanurtema kar repsema lokti mapa inyak.

OLONG PAITEP # 6581

		1					2		3
4									
			5	6	7				8
		9							
			10			11	12		
					13				
14	15				16				
								17	
				18					
19									

TIPIEN

- 2. Mako / Melemzük - (4)
- 4. Kilong nung telemasa - (7)
- 5. Tazüzük - (8)
- 9. Kilong masü - (4)
- 10. Lempak - (5)
- 13. Nemjema bilem - (4)
- 14. Tsük benden - (8)
- 16. T _ _ _ k - (3)
- 18. Temang nungi aluba tzü - (7)
- 19. Ozü tanak ka - (4)

LANGTSÜNGLEN

- 1. Ghonda - (3)
- 3. Süngjang mamen - (4)
- 4. Shilem - (7)
- 5. Langtsüng - (3)
- 6. Mesük - (3)
- 7. Tamajung aküm - (5)
- 8. Atep aokba - (7)
- 11. A _ _ _ gji - (3)
- 12. Itsük takong - (3)
- 15. Mangmang - (4)
- 17. T _ _ _ r - (3)

OLONG PAITEP # 6580 TELANGZÜBA

TIPIEN:

- 1. Semtu, 3. Lepko, 5. Bilem, 8.Ulu,
- 10. Tsünpang, 11. Tesangwa,
- 13. Aoksa, 15. Putir, 16. Yipru.

LANGTSÜNGLEN:

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA



2002 küm Queen Elizabeth II 'golden jubilee' amongtsü atema 'Chivas Regal Royal Salute' ta ser yi (whiskey) khenyongi balaka yanglu. La chuba mendeni atuba kasa mapang 1952 küm ibaji yanglur pongdang nung küm 50 atema enoka ayu. Yamala yi pongdangji 255 shi yanglu.

AITC fact-finding teloki Manipur semdang



July 19, 2023 nü Rajya Sabha MP Sushmita Dev-i Imphal nung osangbener den jembiba angur.

Imphal, July 19, 2023

(Agencies): Züngsem pungu agi akümba All India Trinamul Congress (AITC) teshimtet telok ka Manipur nung tensa asadangtsü atema aruogo.

Rajya Sabha nung TMC Parliamentary Party leader MP Derek O'Brien-i aniba telok nung tetsür MP ana dena lir.

TMC teshimtet telok nung MP & Lok Sabha nung Chief Whip Kalyan Banerjee, MP & Lok Sabha nung Deputy Leader Dr Kakoli Ghosh Dastidar, Rajya Sabha MP Dola Sen aser Rajya Sabha MP Sushmita Dev nung dena lir.

Parnok Kolkata nungi

Imphal airport tonga aruba sülen helicopter ka nung mener Churachandpur district headquarters-i ao.

West Bengal Chief Minister Mamata Banerjee-i Manipur nung kin o kin tsüngda mepetmesü adokba osang tejangja nung metettsü atema parnok yok.

TMC teshimtet teloki Manipur nung relief camps aika semdangtsü sentong lir.

"West Bengal nung alirtem aser AITC ajanga Manipur nung aliba kin balala tsüngda yimjung aser putepa alitsü nenshir" ta MP Rajya Sabha Sushmita Dev-i ashi.

AITC-i Parliament nung Manipur nung atema noktaksü ta lai nangzük.

Manipur tensa maziüktetba atema Centre aser state sorkartem aser talisa Prime Minister Narendra Modi aser tanga BJP lennirtem aitsüba mapang ka nung AITC teshimtet teloki Manipur semdang.

AITC-i Manipur atema aria bilemstü nunga züngsem 60 agi akümba Manipur legislative assembly nung parnok MLA ka danga mali.

AITC indang fact-finding delegation ya Brihostibarnü Imphal toktsür aotsü.

Mizoram indang voters list nungi Bru voters 6,000 agien

Aizawl, July 19, 2023

(Agencies): Mizoram indang voter list nungi Bru voters 6,000 tema agienogo ta ketdangsurtemi ashi.

2020 küm tenangzüktep agiba sülen Bru nung Tripura nung alitsü lemtetba ajanga state voter list nungi parnok tenüng agiener.

Mamit, Kolasib aser Lunglei kübok assembly constituency 9 nungi Bru voters 6,000 tema tenüng agi, ta ketdangsurtemi ashi.

Mamit, Dampa aser Hachhek assembly constituency asem nungi Bru voters tenüng 4,900 tema agiena

liasü, ta parnokisa ashi.

Tripura nung teti atema alitsüpur Bru voters tenüng 948 tashi Kolasib, Serlui aser Tuirial assembly constituency tem nungi agienogo, ta Kolasib district ketdangsurtemia ashi.

August 2, 2023 nü draft electoral roll sayaba sülen ang Bru voters indang osang tejangja metettsü.

Iba electoral roll ya kanga junga reprangshiba sülen October 4 nü sayatsü sentong lir.

1997 küm Bru telungpurtemi Mizo forest officer ka tepsetba sülen kin o kin rara adokdang Bru nung aika Mizoram toktsür Tripura-i jena ao.

Iba tatalokba sülen parnok küm 20 tema transit camps nung liyonga aru.

Centre aser Mizoram o Tripura sorkartem 2009 aser 2019 tsüngda Bru lisopurtem Tripura nung teti atema lidaktsütsü merangdanga liasü.

Tatem nung January 16, 2020 nü Centre, Mizoram o Tripura sorkartem aser Bru telok balala nungi lennirtem tsüngda agreement ka nung sign sütep.

Iba tenangzüktep nung Bru lisopur 35,000 shi kati Mizoram-i meyipa moi Tripura nung teti atema alitsü atema temelaba agüja liasü.

NEHU-i UG courses atema NEP 2020 tenzüktsü

Shillong, July 19, 2023

(Agencies): North-Eastern Hill University (NEHU)-i taruba academic session nungi New Education Policy (NEP) 2020 tenzüktsü.

Iba osang ya NEHU indang Vice Chancellor Prof P S Shukla-i Bodbarnü Shillong Press Club nung metetdaksü.

NEHU nung affiliated colleges ajak dangi iba indang shidi yokogo ta Prof Shukla-isa ashi.

"NEHU-i Post Graduate (PG) students indang academic session 2022-23 nungi NEP 2020 tenzükogo. Külen NEHU nung affiliated colleges ajak dang August 1, 2023 nungi academic session Under Graduate (UG) tenzükdang

NEP mapa tenzüktsü tetuyuba agütsüogo" ta paisa metetdaksü.

"NEHU indang Academic Council aser Executive Council ajanga NEP 2020 mapa tenzüktsü agizükogo. NEP 2020 tenzükba ajanga NEHU-i taruba academic session nungi four-year undergraduate programme (FYUP) tenzüktsü" ta Prof Shukla-isa ashi.

College kari NEP 2020 mapa tenzüktsü memulngra parnoki tetsükdaksü ajurubatem NEHU dangi abentsüla. College kar nungbo iba policy inyaktsü mesademsü akok aser parnok atema academic year ka thinentü temelaba agütsür, ta Prof

Shukla-isa ashi.

June 1, 2023 nü State Education Minister Rakkam A Sangma-i reju aika nung National Education Policy (NEP) 2020 mapa inyakba nung timtem ajuruba osang metetdakja liasü.

Education department-i educational institutions tekolakpurtem den ajurutepa sendentem menogo. Parnoki academic year 2023-2024 nung NEP 2020 mapa metenzükba osang lemsatp, ta Minister Sangma-isa ashi.

Meghalaya state sorkaria NEHU aser Principal Council den senden aiben menogo aser idangji tang atema NEP 2020 mapa metenzüki atatsü telemtetba agia liasü.

MENUNGRA-A BILEMTETER



Asür Süngjemsongla Ao (Chuchuyimlang)

Tasübai ajak piladaksütsü akoker, saka iba tasüba yagia nisung Kati akümlidang züsenteta doktsüba tamang, teimla, temeim aser ajemaluba sempetji peladaksütsü makoker.

Temeim Oja, tanü nai onok doktsür oer Küm ka suitema oaka onok mulungjang nungi nai akümlir nem rezünga doktsür aoba taküm libaliro tatishitsü mapa tajung jaki onok mulungjang nung teti jembir aser akümlir ajak asoshi mesamatetba Rongsen tulitiba ta züngshir .

Mamatetba Kinungbo/Chirnur, Semchirtem aser anükapang

MENUNGRA BILEMTETER

Sür Küm 1 Ajungba



T. YANGER PONGENER

21.12.1963 - 20.07.2022

NISUNG TAKUMJI SAMAR SAKA TEMEIM JI KODANGA MAJENER. TANU NA ONOK DEN MELIACA ONOKI NA TETI MENUNGRA BILEMTETER

Temeim chirnurtem aser kinungertem

South Africa nung BRICS senden nung Putin madentsü

Moscow, Chiteni/July 19 (Agencies): August ita agitsü aliba BRICS linüktem senden nung Russia Tir Vladimir Putin madentsü, ta South Africa-i Bodhbarnü jangjatsüogo.

"Ajaki molungtepa Russian Federation Tir Vladimir Putin senden nung madentsü, saka Russian Federation tenung nung Foreign Minister Sergei Lavrov adentsü," ta South Africa Tir Cyril Ramaphosa atema odongtar Vincent Magwenya-i sangdong ka nung ashi.

South Africa nung 15 buba BRICS Summit ayongzüksü renema lir, ta Tir Cyril Ramaphosa-i shia liasü, kong Brazil, India, China aser South Africa lenirtem adentsü. Ajisüaka ajak tangatetep nung Putin madentsü.

Pa melen Russian Foreign Minister Sergey Lavrov adentsü. COVID-19 pandemic sülen tang mezüngbuba tsüngtong arua BRICS Summit alitsü mapang iba telemtetba ya agir, kong telemtetba balala agidang Russia indang shilem alimai repranga atar.

Tir Ramaphosa-i sangdong ka nung, iba Summit ya takok ngua agitetsü imlar ta ashi aser alima tesem balala nungi delegates aika arutsü alirtem anepalua amshitsü linük dang ayongzüka liasü.

Iba senden nung Vladimir Putin adentsü jaokogo, ta South Africa tiri shir anogo ishika sülen pa medentetsü osang ya ajungbena arur.

South Africa ya tang BRICS menden lir, aser ICC züngsem ka ama 'diplomatic dilemma' ka bentetsü meranger, kechiaser Putin ya South Africa-i arura aputsü akok, ta amanger.



OFFICE OF THE Aoyimkum Village Council

DIMAPUR DIST. : NAGALAND Regd. No. Cab. 13/17/83. (Vol-11) Date: Kohima 17th May '88 P.B.O. 246

METONGSHIR

June 25, 2023 Tir Yimyim adok nung Aoyimkum Village Council-i "Sangdonger" ta ser adokba nung SI.No. 3 nung Mr. Imlitoshi S/o. Mr. Imlisunep, Chuchuyimlang village ta ser adoktsüogo.

Mr. Imlisunep-i kuli asüba meyipa aginung Aoyimkum yimden-i pa nem tapet temerenshi agütsüogo. Anungji SI.No. 3 Mr. Imlitoshi S/o. Mr. Imlisunep, Chuchuyimlang Village ta adokbaji SI.No. 3 Mr. Imlitoshi S/o. Lt. Imnawati, Mongsenyimti Village ta metongshitsür.

Sd/- Imchainba Chairman, AVC

Sd/- Putunungsang Longkumer Secretary, AVC

Sd/- Nungsangtoshi GB, Aoyimkum Village

Bangladesh nung PM Hasina anema longkak aiter, nisung ka süogo

Dhaka, Chiteni/July 19 (Agencies): Bangladesh nung January ita election agitsü imla aliba mapang Ato Kilonser Sheikh Hasina mapa nungi ananjang ta takhangba agüja nisung meyrirjang aikati longkak aيتدang opposition activist ka süogo aser noklang aika yirua lir.

Opposition activist meyrirjang aika Mongulbarnü anü tatsük nung linük yimtiba Dhaka aser danga yimti temi Hasina ato kilonser menden nungi alutsü takhangba agüja jaja liasü.

Hasina'er Awami League ajanga alima nung nütsüung yongsük timtiba jenjang ti buba nung aliba linük nungya 2009 nungi yimsü süa aru aser parnoki meimchir temeden anema inyak aser ochimashi mapa inyak ta aitsür.

Taoba ato kilonser Khaleda Zia-i anir opposition Bangladesh Nationalist Party (BNP) aser sendaktepa aliba telok tila ter dak temai Hasina ato kilonser menden nungi alua neutral caretaker government ka kübok election agitsü kanga linük tesem ajungalen longkak aittsü ayongzüka liasü.

Dhaka nung yimti tesem balala nungi activist aser bukumer tem adenshia kilometre 13 jungnüa jaja aser tesem aika nung gari marakzüteti ghonda aika anendaka liasü.

"Iba lenmang nung jajaba nung shilem agirtem ya aika political party nungi masü.

Parnok lenla balala nungi arurtem lir, taxi driver tem nungi truck driver tem aser rickshaw anishirtem lir, aser rongsenketzüng majungba ajanga parnoki sorkar dang mepelar ta ashir," ta Dhaka nungi osangbener kati ashi.

BNP ajanga ashiba agi, parnok jajaba mapang Dhaka aser danga tesem 16 nung nung Mongulbarnü amak.

"Ruling party indang student wing züngsem kati Laxmipur nung activist Sajib Hossain khaset," ta BNP odongtar Zahir Uddin Swapan-i ashi.

Linük south tsütsü tzükum anasa aliba district nung police temi BNP bukumer dak shotguns agi injang khaloktsü aser iba mapang nisung 200 yiru, ta pai ashi.

Sorkar meyong Laxmipur Sadar Hospital nung doctor Joynal Abedin-ia nisung ka tepsetogo aser 50 yiru, ta ashi.

Bangladesh yimtenren asoshi Western sorkari khuret lemsatapa liasü, kong Hasina'er party-i legislature amokbanga lir.

Lar security forces temi opposition activist meyrirjang aika apu, aika tepset ta aitsür aser lenir noklang aika samaba atema parnok dak tai tonglokja lir.

Meimchir temeden anema tashiyim amshiba mechi Washington-i 2021 nung elite Rapid Action Battalion (RAB) security forces aser yangjir lenir tenet nem sanction agüja lir.

Mulungnen



ASO : 1932

ASU : 9 July 2023

Onoki teti meima aliba Ojala asür Mrs. Yimyanglula Tzudi (Yimjenkimong) la sür onok mangyim tia nung alidang, akümlir sobaliba tajung dak sentakba maparen inyaka aoba mapang ajak nung nüburtemi ana aser talang nung alir shirnokisa sarasadem, nübu, rongsen aser tenla balala agi yariogo, nenok ajak dang kanga pelar. Tarutsü anogotem ajak nung Tsüngremi nenok ajak moajangma ta onoki sarasademtsür. Amen !

Temeim Jalatem, Semchirtem, Anükapang aser Kinungertem.



OFFICE OF THE UNGER SENSO BENDANG ALI TELONGJEM

H.Q. Dimapur, Nagaland Sub Centre

TENÜNGSANG AGÜTSÜR

Unger Senso Bendang Ali telongjem ajanga Kija nuburtem shirnokisa maparen balala nung takok ngutetogo, parnok ajak nem tenüngsang agütsür aser maneni Tsüngrem tenung asanger. Tsüngremi nenok wadang nung maneni temoatsü sua len aniangma.

- (1) Dr (Mrs) Latonglila Jamir D/o. Lt. Mr. Chubanungba Jamir-i Nagaland University kupok Department of Environmental Science nung Associate Professor.
(2) Mr Imnaakum Imsong S/o Mr & Mrs Imsongmeren Imsong-i NBSE tatitang agiba kupok HSLC Examn 2023 nung Top 11.
(3) Mr Shingangmeren Imsong S/o Lt Mr Imliyabang Imsong & Mrs Imnamongla Jamir-i NBSE tatitang agiba kupok HSLC Exam 2023 nung subject topper, Social Science 100.
(4) Miss Sentilila Jamir D/o Mr Opanng Jamir & Mrs Temjensongla Imsong-i NPSC ajanga tatitang agiba nung Techinal Education Department kupok Lecturer in Interior Design nung Rank 1.
(5) Miss Imnakala D/o Mr Imkongchuba Jamir & Mrs Sentikumla Imsong-i NSSB tatitang agiba nung LDA cum Computer Assistant (District).

Iba den kulemi Govt. High School Unger Yimtsung nung maneni tang HSLC tatitang 2023 100% takok anguba asoshi Shisashir aser Tesayurtem ajak nem tenungsang agütsür.

Sd/- N. Lima Imsong President USBAT

Sd/- Walu Jamir General Secretary USBAT

Mokokchung nung angati boxing coaching camp tenzükogo



BAM ketdangsürtem, coach tem, technical staff aser boxing camp nung shilem agirtem July 19 nü Multipurpose Indoor Stadium Mokokchung nung tangokba noksa nung angur. Iba camp ya July 29 nü tembangtsü.

Mokokchung, Chiteni/July 19 (TYO): Tanur arishi küm 5 nungi 16 tsüingda alirtem atema anogo ter asoshi angati boxing coaching camp ya Multipurpose Sports Complex, Mokokchung nung tenzükogo.

Iba coaching camp ya Nagaland Amateur Boxing Association (NABA) nung züingoksema aliba Boxing Association Mokokchung (BAM)-i ayongzüka agidaki. Iba camp ya 'the future of boxing is in the small gloves' omen nung ajemdaker agidar.

Iba camp nung shilem agitsü

atema tanur 103 (tetsür 28 aser tebur 75) züingoksema lir. Mezüingbuba anogo tanurtem aika mezüingoksemetet asünung, tsürapurtemi mepeshiba dak ajemdaker BAM-i tenüing züingoksemtsü atema July 20 nü tashi mapang atsülangtsüogio.

"Onoki imlaba dang nungi timba iba camp atema tenüing züingoksemogo aser tanurtem camp nung shilem agitsü atema ajungshiba asoshi tsürapur aser school tem dang kanga pelar," ta BAM General Secretary Bendangtemsü Ozukum-i ashi.

Sentong nung tanurtem

ajungshiba mapang BAM Advisor, M. Supong Longkumer-i, parnok dang yimyayimpong tajungtiba benshitsü aser camp nung mapang shidak amshitsü ayongzüka liasü. Paisa, parnok dang machimajemtsü nungi pila alitsü aser anema alitsü asoshi jenjang tapet agitsü ajungshia liasü. Maneni pai taküm nung takok nguyonga aotsü atema Tsüingrem dak teti tamang akatsü ajungshi. Paisa tarutsü nung item tanurtem yagi state, national aser international jenjang nung konang tetushi

aika bener arutsü imlaba lemsatep.

Sentong nung MTBA Youth Promoter, Intimongba-i Tsüingrem leniba aser camp tepeyong temaotsüma nung agitsü atema temaotsü meshizüka sarasadem.

Iba boxing camp nung coach temji Bendangakum, Mongsensari Longkumer, Nokingyanger Aier, Akum

Imchen aser Tongpangnokcha Longkumer nunger asütsü. Parnok nem technical staff team tashi tait kati teyari agütsütsü.

Camp ya July 29 nü tembangtsü. Kasa mapang nung camp tembangba sülen shilem agirtem nem kuli kakat agütsütsü aser asayartem rongnung tebur ka aser tetsür ka nem most promising player kuli kakat agütsütsü.

19th Nagaland Chess championship nung asayar 48-i shilem agidar



Kohima, Chiteni/July 19 (TYO): Nagaland Chess Association (NCA)-i ayongzüka Olympic Association Complex nung tang asaya aliba 19buba Nagaland State Chess Championship nung asayar 48-i shilem agidar.

Asayartem rongnung arishi küm ti tain Damian Lyngdoh ya ajak dang tanobusang aser arishi küm 69 tain K. Sekhama ya tambusang lir.

Asayamung lapokba sentong nung o jembiba mapang Kohima Deputy Commissioner Shanavas C-i, India nung mapang talangka Cricket asaya yagi saisapong amokbanger aruogo saka Chess, Badminton aser Football densema tanga asayartem international jenjang nung takok tajung ngua arudar, ta ashi.

Paisa, Chess ya shi temang arakzüa asayaba asaya ka masü saka tekelok

shitsü amshia asayaba asaya ka lir kong asayartem taja tajung yanglua asaya dak rangloker asayatsü nüingdaker. Chess asayaba ajanga kaketshisatsü bushiba nunga teyari agütsür kechiyong iba yagi tekelok aser rasa bilemdangtsü asoshi tangazükba agütsür, ta ashi.

Paisa, asayartem dang tangari nongshiba agi masü saka jangrabangra asayatsü aser temaba jenjang nung tokteptsü atema nükjidong ayutsü ajungshi. Maneni pai tamakok anguba mapang tezü medangi nükjidong tulu yur takok asoshi meranga inyaktü ajungshi.

State sorkari asayartem nem teyari periabo magütsür ta shia sorkari asaya balala nung asayartem nem teyari agütsütsü imlaba lemsatep. District Sports Council tenüing nung paisa takokba tashi asaya ajungkettsü atema inyaktü tenangzükba agütsü.

Lokti pela agizükba o

jembiba mapang NCA honorary secretary & joint secretary All India Chess Federation (AICF), Mughaho Awomi-i, temaba jenjang nung tembangba asayar pezüi Nagaland tenüing nung national chess championship nung shilem agitsü, koba Pune nung August 16 nungi 26 tashi asayatsü ta metetdaktüsü.

Grassroots nung terenlok nüingdakba reprangteta NCA-i, AICF sponsorship aser State sorkar den longjemer school tem nung chess asaya atema coaching camp ayongzüka agitsü sentong yangludat, ta pai ashi.

Iba asayamung nung ajak senteper senpet sen 2,06,000 agütsütsü, kong Best women player aser Best 60 years & above player densema lir. Iba den Open, Under-18 aser Under-14 category nung takok angurtem nem takok marnok aser kuli kakat agütsütsü. Iba asayamung ya July 22 nü tembangtsü.

Korea Open: Sindhu tsükogo; Prannoy tanabuba round-i iogo

Chiteni/July 19, 2023

(Agencies): Olympics nung medal ana tashi ngur alila PV Sindhu taküm maneni junga Korea Open Super 500 tournament nunga mezüingbuba round nung Chinese Taipei tsür Pai Yu-Po-i Bodhbarnü tsükdaktüsüogio.

Sindhu, shiba iba hopta jenjang 17bubai asepzüka luogo, la arishi küm 32 tain world no. 22 asayar Pai Yu-Po 18-21 21-10 13-21-i agi koka liasü.

Sindhu yirur ita pongu tashi masayai lir meyipa arur asayadar ajisüaka tang tashi junga masayati arudar aser taküm asayamung ka danga koka mali. Sindhu ya taoba mapang world number 2 asayar liasü ajisüaka lai taküm asayamung 14 nung point 49,480 dang nguteta lir.

2013 küm January ita sülen la küm ter tsüingda tang ranking nung tekübokba jenjang nung lir. La 2016 küm nungi top 10 nungi matsüingshi liasü aser 2016 küm April ita tanabuba jenjang tashi tongtetogio.

Kasa asayamung tebur kija asaya nung Prannoy bo tanabuba round-i iogo. Tebur kija asaya mezüingbuba round nung pai Belgium nunger asayar Julien Carraggi 21-13, 21-17 agi koka liasü. Pa tanabuba round nung Lee Yun Gyu mesüra Lee

Cheuk Yiu den asayatsü.

Ajisüaka tebur kija asaya nung Srikanth-a mezüingbuba round nung tsükogo. Pa Japan nunger asayar Kento Momota-i 21-12, 22-24, 17-21 agi tsükdakja liasü.

Kasa mapang nung tarep temeyoktep asaya nung N Sikki Reddy aser Rohan Kapoor nabo Phillipines nunger tarep Alvin Morada aser Alyssa Ysabel Leonardo na 21-17 21-17 agi koka tanabuba round-i iogo. Tenati taküm June ita Victor Denmark Masters international challenge kokogio.

Tena tanabuba round nung China nunger tarep Feng Yan Zhe aser Huang Dong Ping na den asayatsü.

India nunger rongnungi Aakarshi Kashyap, Tasnim Mir, Mithun Manjunath aser Ashmita Chaliha nunger ajak mezüingbuba round nung tsükatokogio.

Tebur kija asaya nung ano Kashyap-a China nunger asayar Zhang Yi Man-i 12-21 17-21 agi akok aser Mir-a Korea nunger asayar Kim Ga Eun-i 11-21 18-21 agi tsükdaktüsüogio.

Maneni National champion Mithun-a Malaysia nunger asayar Ng Tze Yong-i tsükdaktüsü aser Ashmita-a Olympic champion Chen Yu Fei-i 13-21 12-21 agi kokogio.

BILEMDANGANG

"Temerangdangba melira takok mongutettsü."